
RAIMON GAUCELM de Bezers.

2701, 7226.

A penas vauc en loc qu'om no m deman :
R. Gaucelm , avetz fag res novel ?
Et ieu à totz respon ab bon talan ,
Quar totas ves m'es per ver bon e bel ;
E m plai quant aug dir de mi : aquest es
Tal que sab far coblas e sirventes.
E no per so qu'ieu volha qu'om del mon
Me don raubas , qu'ieu n'ai pro e sai don.

E per so n'ai joi et alegrier gran ,
Quar mant home valen me fan cembel
De lor amor e me venon denan.
Qu'estiers nul temps no gazanhei castel ,
Borda ni mas , ni'l quart d'un clarmontes ,
Ans me costa que val cinc cents tornes :
Mas non o planc , quar d'aval o d'amon
N'aug mais nomnar lo meu frair' en Ramon.

Pero aquel que dis que trop mal fan
Cels que donon ment plus que fals mezel ;
Quar qui dona a lauzor on que s'an ,
E grat de dieu que'l mon ten en capdel :
Quar ses donar nuls hom valens non es.
Pero val mais lo dos on plus francs es ,
Quan caritatz l'adutz à cor volon ,
Lai on merce li fai planca ni pon.

Mas negus hom no vei , don m'es pezan ,
Qu'à son manjar negun paupres apel ;
E sai ne motz que dins lai on estan
S'acluzon plus no fa son past auzel.
E sai prelatz e terriers e borzes
Que s veston quetz quascus de mes en mes ,
Que quascus vent sos vestirs à rescon ;
Qu'à nul paupre no vei negus aon.

Negus d'aquest no fan ges lo semblan
De San Marti , que partis son mantel
Ad un paupre qu'anava tremolan ;
Et es me greu , quar sai qu'estran mazel.
Sera d'els fatz lai on la cremor es
Del foc d'ifern ; e sai que mal 'lor es
Quan hom lor ver en cantan lor despon ;
Pero mens pres aquel que mais en gron.

Sirventes vai drech camin à Pales
Al mieu frair' en Ramon Gaucelm , quez es
Savis e ferm ; et a fin cor volon
De far bos faitz aitan quant hom del mon.
